

## Ritnefnd Sjúkraliðafélagsins

Ritnefnd er skipuð þremur félagsmönnum, auk varamanns, og er kosin á fulltrúapingi til þriggja ára. Ritnefnd skipa María Ágústsdóttir, María Busk og Þorbjörg Rut Guðnadóttir. Varamaður er Sigríður Karlsdóttir. Ritnefnd annast útgáfu og ritstýrir málgagni félagsins „Sjúkraliðanum“ ásamt ritstjóra blaðsins.

Frá síðasta fulltrúapingi hafa verið gefin út fjögur tölublöð Sjúkraliðans, þar af eitt orlofsblað með upplýsingum um orlofskosti sjúkraliða fyrir komandi orlofstímabil.

Blaðið er mjög vandað að allri gerð og prýtt fjölda ljósmynda. Ritnefnd hefur kappkostað að hafa blaðið sem fjölbreytilegast í efnisvali.

Blaðið Sjúkraliðinn er gefinn út í 3.300 eintökum sem dreift er til félagsmanna, heilbrigðisstofnanna, ráðherra, alþingismanna, fjölbrautaskólanna og annarra sem hafa áhuga á málefnum sjúkraliða og félagið telur nauðsynlegt að halda upplýstum um málefni félagsins og félagsmanna.

Fastir þættir hafa verið í blaðinu undanfarin ár, má þar nefna ritgerðir sjúkraliða og annað efni eftir sjúkraliða sem ritnefnd finnst eiga erindi til okkar allra. Kynntar hafa verið stofnanir og störf sjúkraliða sem sýnir hvað störf sjúkraliða eru fjölbreytileg. Einnig eru í blaðinu greinar um kjaramál, lífeyrismál og annað efni sem er í brennidepli.

Blaðið er einnig gefið út rafrænt og er hægt að nálgast það á heimasíðu SLFÍ.

Ritnefnd vill þakka sjúkraliðum fyrir góðar á ánægjulegar móttökur inni á stofnunum og þakka félagsmönnum fyrir góðar viðtökur við blaðinu og öllum sem hafa komið að útgáfu blaðsins fyrir ánægjulegt samstarf.

## Skýrsla orlofsnefndar

Orlofsnefnd skipa þær Úlfheiður Ingvarsdóttir, Halldóra Lydía Þórðardóttir og Helga María Arnardóttir. Varamaður er Dagný Einarsdóttir.

Starfsmaður orlofsnefndar er Gunnar Örn Gunnarsson, framkvæmdastjóri SLFÍ.

Stjórn orlofsnefnda er óbreytt frá síðasta ári og Úlfheiður Kaðlín Ingvarsdóttir er formaður orlofsstjórnar.

Stjórn Orlofssjóðs Sjúkraliðafélags Íslands hélt sjö stjórnarfundir á síðasta starfsári. Stjórnin reynir að fylgjast vel með þörfum og væntingum félagsmanna varðandi orlofsmál til að geta brugðist við þeim kröfum sem uppi eru hverju sinni. Áherslur síðustu ára hafa verið á endurnýjun og viðhald orlofseigna félagsins og eru allir bústaðir félagsins í mjög góðu ásigkomulagi.

Rekstur orlofssjóðs gekk vel á síðasta ári og hefur hann gert upp skuld við Félagssjóð. Ríkið hefur staðið við umsamdar viðbótargreiðslur í orlofssjóð og hefur það haft góð áhrif á efnahag sjóðsins, en erfiðlega hefur gengið að fá Reykjavíkurborg til að standa við gerða samninga.

Orlofsnefnd félagsins leggur áfram metnað sinn í að bjóða félagsmönnum upp á sem fjölbreytilegasta orlofskosti í sumarleyfinu. Til þess hefur hún leitast við að taka upp einhverja nýbreytni hverju sinni og haldið áfram með þá kosti sem hafa gefist vel árin á undan. Helstu nýjungar sumarsins 2012 voru þrjú hús á Spáni tvær hjóla- og tvær gönguferðir um Evrópu með íslenskum farastjórum. Orlofssjóður keypti nýtt 70 fm. orlofshús í Skagafirði sem stendur við Reykjarhólsveg í Varmahlíð og lagði töluverða vinnu í að endurnýja og betrubæta húsið áður en það fór í útleigu.

Stjórn Orlofsnefndar mun áfram leggja aðaláherslu á fjölbreytta afþreyingu og ferðir innanlands en bjóða jafnframt upp á aukna möguleika á gistingu erlendis með

íbúðum á Spáni og í Danmörku og göngu- og berjaferð undir leiðsögn fararstjóra innanlands.

Umgengni og frágangur félagsmanna við orlofshús er yfirleitt til fyrirmyndar, en það kemur fyrir að til félagsins berast kvartanir um slæman frágang og kemur þá oftast en ekki í ljós að sjúkraliðar eru að lána tengdum aðilum húsin og er frágangi þá ábótavant. Stjórn orlofsnefndar leggur ríka áherslu á að félagsmenn virði eigin félagsins/sínar og skili þeim til viðtakanda hreinum og óskemmdum, þannig er mögulegt að losna við að ráða umsjónarmenn með orlofseignum félagsins. Ákvörðun sem hefði í för með sér verulega hækkun leigugjalda.

Orlofssjóður félagsins hefur verið góðu rekstrarlegu jafnvægi.

Í Varmahlíð var töluvert endurnýjað, hús málað, veggir slípaðir, stór ísskápur keyptur og sambyggð uppþvotta- og eldavél.

Síðastliðið vor var dyttað að öllu því sem orðið var lúíð og þreytt fyrir sumarútleigutíma. Rólur voru lagaðar, hús og pallar málaðir, flikkað var upp á vindskeiðar, rennur og handriði á verandir og borið var ofaní aðkeyrslu. Í Munaðarnesi hefur pallurinn/veröndin verið endurnýjuð og stækkuð mjög mikið.

Umsóknir og úthlutun orlofskosta til félagsmanna voru áfram unnin rafrænt með þar til gerðu forriti, Frímanni. Þeir sem ekki höfðu aðgang að tölvu gátu sótt um skriflega. Rafræni kosturinn á að gera félagsmönnum mögulegt að sækja um og greiða leigugjöldin strax með millifærslu af Visa reikningi. Félagið hefur verið með samning við tölvuþjónustufyrirtækið AP media sem sér um og hagnar orlofssíðu félagsins og heldur einnig utan um orlofsúthlutunar tölvukerfi félagsins. Reynslan af því samstarfi er mjög góð.